

...elkarrizketa

**David Montero**• GEHITUKO
KOORDINATZAILEA •«Jende askok
merezi izan du
Latorrizko Saria
2000»

GEHITUk (Euskal Herriko Gay eta Lesbianen Elkarteak) homosexualitateari buruzko jardunaldiak antolatatu ditu.

■ **Zenbat urte daramatzazue hitzaldi hauek antolatzen?**

Hirugarren aldia da. Iaz emakumea izan zen hitzaldi hauen ardatza. Aurten, familia homosexualari buruz dira jardunaldiak.

■ **Zergatik gai hau?**

Hainbat arrazoi daude. Guretzat gai hau oso garrantzitsua da, eta sexu berdineko bi pertsonak familia bat osatzeko duten eskubidea azpimarratu nahi dugu.

■ **GEHITUk Latorrizko eta Zilarrezko sariak banatzen ditu urtero. Aurten norentzat dira?**

Latorrizko saria jende askok merezi du. Hala ere, norbaiti eman behar zaioenez, Iruñeko, Mondoñedo (Lugo) eta Malagako apezpikuei eman diegu. Izan ere, pertsona hauek homosexualen aurka egindako hainbat adierazpen erabat arbuigarriak iruditzen zaizkigu. Adibidez, Iruñeko apezpikuak, orain dela gutxi pertsona homosexualak arazo antropologikoak dituzten gizakiak direla adierazi zuen.

■ **Eta zilarrezko saria?**

Nafarroako Parlamentuari eman diegu. Izan ere, Bikote Elkartzeko Egonkorraren legea medio, onartu dute sexu bereko pertsonen haurrak adoptatzeko eskubidea dutela.

Gorka Quevedo
DONOSTIA

...esaera

«Nagusi eroa baino gogorra hobe»

...hizpideak

0 perfileko Euskal Herria

■ Bata bestearen atzetik datoz, azkenaldian, euskal hezkuntzaren eta euskalgintzaren aurkako erasoak. Abertzaleen arteko banaketa baliatuz, EAEko Legebiltzarrean osatzen duten gehiengo berria hezkuntzaren eta euskalduntzearen alorreko lanari galga jartzeko baliatzen ari dira, batik bat, PP, PSE-EE eta UA: ikasliburuak aztertze eskakera, hizkuntz ereduak berrikusteko batzordea, Irale erreformatzeko proposamena, AEKri diru laguntza kentzekoa, Euskararen Aholku Batzordean kide

erdaldunak sartzeko proposamen harrigarria... Denak bide beretik doaz.

Gaur bertan eztabaidatuko den proposamena erekin, euskararik batere jakin gabe EAEko Administrazioan funtzionario izateko bidea zabaldu nahi du PPK: 0 perfila sortu nahi dute.

EAEko Administrazioan euskaldunek jasaten duten bazterkeria hain nabarmena izanik, aurrerapausoak hain gel-doak direlarik, halako proposamena iraintzat eta erasotzat baino ezin da hartu. 0 perfileko Euskal Herria nahi dute,

GRAPOkideen
atxiloketa

■ GRAPO talde armatuko ustezko 8 kideren atxiloketarekin, Frantziako Poliziak kolpe gogorra eman dio taldeari. Polizia iturrien arabera, atxilotuen artean daudenetatik bi dira, Manuel Perez Martinez eta Fernando Silva Sande, talde armatuko arduradunak. Paris inguruan eginiko polizia operazioan bost pisu miatu dituzte, baita bestelako azpiegitura batzuk ere. Azkenaldian Espainiako hainbat lekutan egindako ekintza ugari bere gain hartu ditu GRAPOk.

Historia egiten
ari da Alaves

■ UEFAko hirugarren saiora sailkatu da Alaves, Norvegiako Lillestrom taldea kanporatuta. Eta Espainiako Ligan Maneren taldea egiten ari dena ere, txapela kentzeko modukoa da. Osasuna, Real eta Athletic pattal ari direlarik, iragan hurbilean *laugarren taldea* izan zena eredu bilakatu da beste euskal taldeentzat. Iaz ere, lauretan onena izan zen, baina ohikoa izan duen apaltasunari eutsiz jarraitzen du.

Euskal Departamendua beti zain

■ Lionel Jospinek iaz Pierre Mauroyri deszentralizazio berrirako proposamenak egin zitzaizkion galdegin zionetik, Euskal Departamenduaren aldeko hautetsiek Mauroy Batzordearekin biltzeko eskaera egin zuten. Mauroyrek bilkura, atzo besterik ez zuten egin, Mauroyk bere behin-betiko proposamenak Jospini aurkeztu eta astebetera.

Departamendua zenbait aldaketarekin egitura egokia dela aitortzen

badu ere, Ipar Euskal Herriak Frantziako Errepublikaren baitako departamendu bat behar izatea konprenitzen duela badio ere, Euskal Departamendua ez sortzeko Hegoaldeko bortizkeri-egoera aitzakiatzat agertu zuen Mauroyk, berriz ere. Frantziak Espainiarendako «itsusi» litzatekeenik ez dezakeela egin adierazi zuen. Bizkitartean, Euskal Departamenduzaleak eta euskal herritarrak beti itxoiten. Noiz arte?

...pertsonaiak



PATXI AZPARREN • Desobedientzia zibila bul-tzatzeaz akusatuta atxilotu zuten urriaren 5ean, eta hilabete egin du espetxean. Esperientzia horren berri eman digu Azparrenek.



PEPE REI • Jasaten duen jazarpenagatik «eten-gabeko salbuespen egoera» bizi duela dio *Ardi Beltzako* kazetariak. Salaketa bat aurkeztuko du bere aurka esan diren «irain eta gezurrengatik».



INAXIO OLIVERI • Hezkuntza arma alderdikoi gisa erabiltzen ari direla salatu zuen atzo Eusko Jaurlaritzako Hezkuntza sailburuak. PPren gaitzespenak estrategia jakin baten ondorena direla esan zuen.

...datua

210.000 etxetresna elektriko kiskali ditu suak Fagor enpresako Gasteizko biltokian.

...adierazpena

«Amorraziorik gehiena ematen didana da zenbait lekutan bertso ona edo txarra kantatu txalo berdina jotzen dutela»

Joxe Lizaso
Bertsolaria

ooo seiko urrea

• JOSE MARI AGIRRE •

Azkeneko kinta



Iparaldean lehenagotik zetorren soldadutzarekiko bete-beharra, baina han milaka mutil gazte erbesteratu omen ziren, batez ere Ameriketara, besteak beste, hiruzpalau urteko soldadutzari muzin egiteagatik. M. Etcheverry, euskal diputatuak, 1892an Pauen aurkeztu zuen txosten batean agerienez, 80.000 pertsona partitu ziren departamendutik 1832-1891 bitartean. Horietatik haren bi euskalduna zela dio eta

gehienak 20 urtez beharakoak; beraz, beste arrazoi gehiagoren artean, soldadutzari ihes egin nahi ziotenak.

Harrezkero, belau-naldiz belau-naldi,

kintoz kinto, euskal hiritar gazte ugari pasatu da morrontza horretatik; batzuek erdararik ezagutzen ez zutenak, eguneroko girotik eta bizimodutik at sentitzen zirenak ia denak. Ikusi bestela bizitza sasoi hartako kanta, bertso eta bertso paperak.

Geroago etorri ziren kontzientzi eragozpenak eta intsumisioak, atzo esate baterako, baina ekintzaile horien ausardia, bereziki lehenengoena, eraginkor gertatu da une honetara heltzeko.

Euskaldunok beti izan dugu ohitura, mahai baten ondoren, hobeto esateko, otordu baten inguruan edozer ospatzeko eta egia esan nik ez dut ezagutzen hemen adina kinto bazkari edo kinto afari egiten den lekurik. Goierrri aldean hainbat ez, behintzat. Gainera bada oraindik, batik bat baserrietan, adina kintoka kontatzen duenik. Halako kintakoa nauki, hura nire aurreko kintakoa duk, guk ikasturte berdinekoak garela esan nahi dugun gisan. Aurrerantzean ez dira urteak kintoka kontatuko.